

## Ünnern Regenschirm

Mitünner denk ik an uns eerstet Drapen ünnern Regenschirm.  
Uns Huut striep sik an de Arms un verlegen grien mien Deern:  
„Mit Se to tweet ünnern 'n Schirm, dat mach ik förwiß geern!“  
Heff hüüt noch vör Ogen, as ut Nieselregen 'n asiges Donnerweder wüür,  
un wi so natt as de Katten, wieldat uns Regenschirm teemlich undicht weer.  
Bi 't Dunnergrollen neck ik: „Bangbüx!“ Ehr Ogen blänkern as düstern Seen.  
Denn zuck een Blitz daal, se dräng sik an mien Bost, un ik dach beglückt:  
„So 'n beten Schiß bitieden is doch ok ganz schön!“

Ik seh noch jümmers, as na dat Schietweder de Sünn ruutkrööp.  
Ik mi an 't Schirmgestell denn Duum klemm. „Deit weh?“ fröög se sööt.  
Seh noch jümmer, as ut Regenpütten de warme Waterdamp opsteeg,  
un ik ehr sööte Snuut mit de drolligen Grientjes to sehn kreeg.  
Sülvern Sprenkels danzen in ehr Ogen, de blänkern as düstern Seen.  
Knallroot slöög se dor ehr langen Zimpern daal, un ik dach beglückt:  
„Man man, wat is se blots schön!“

Een Jahr later Hochtiet, se mit bunten Bruutstruuß in de Hannen,  
De Preester mahn: „Hefft juuch jümmers leef bit an 't Lebensennen!“  
Denn de ersehnte Tiet, wi Beiden weern endlich mol alleen,  
flögen in denn sövten Heben, wullen nix as de Tokunft sehn.  
Ik sööh dat Glück in ehr Ogen, de noch deper blänkern as düstern Seen,  
un kreeg ehr warme Leef to spöörn, balden ok uns lütten Kinner.  
Unvergeten düüse Tieden, mitünnern swoor, aver tomeerst schön.

Lange Johren mit Sünn un Regen. Af un an bruken wi mol denn Schirm.  
„Dank Di vör kommodige Tieden“, sääh se liesen un denn ehr Verfehrn  
wegen Dunnergrollen, un tein Meter wieter slöög een grelle Blitz in Boom.  
Ekelige Swevelgeruuch steeg in de Nees, poor Sekunnen as 'n Alpdroom.  
Verjaagt keken ehr düstern Ogen, dicke Tranen kullern över ehr Backen.  
Bang fröög se: „Woveel Jahr blievt uns wohl noch vör 't Schirm utpacken?“  
Ik legg denn Arm üm ehr smalle Schullern, fröög full Trost, worüm se ween.  
„Wenn de Herrgott dat will, blifft uns Tiet bestimmt noch schön!“